

# LLETRES NUEVES

## Poemes

Carlos E. Camporro

### ÁRBOL D'ISLLA

Dexéte una mañana murnia d'entierru  
asoleyada y yá pegañosa.  
Dexéte una mañana qu'enxamás esistió  
a nun ser nel mio maxín  
probe d'espíritu y de tou.  
Camín del aeropuertu nun miro atrás  
y asina nun lloro.  
Va xubiendo un fondu "blues".  
Yá nun sé si existen siquiera los aeropuertos.  
Lo único cierto ye que yá nun queden piles  
nin pa escaecer.

### CANTÁBRICU

Un mar d'espeyu infinitu fui.  
Tolos branos convirtiéronme en mar  
y esta vegada foi cimera,  
acostéme con barques y enxamás  
me ximielgaron les foles.  
A pesar de tou  
equí me tienes,  
Mar Cantábricu.

## LLUNES DE FIERRO

Ceu, de mañana canta'l páxaru.  
Ye la hora levantase, d'axustar les frebes  
y potenciar los músculos animales,  
ye rutinar un día más  
a la gueta d'un fin de selmana  
llocu si pue dase.  
Ye l'ablayu la murnia, un llunes más  
convencíu de que los páxaros nun se droguen  
a pesar de tou.

## L'INFIERNU D'ARRIBA

Fasta cuatro, fasta cuatro caballos blancos  
blinquen enfilao de ralo en ralo.  
Del cielu al infiernu caen flores roses  
y ambúrense llueu.  
Cayendo pueo atalantar daqué  
d'esti viaxe. Estáticu, yá non.  
Y nel infiernu ye mester xubir,  
dicen.  
Si baxes ye que tas averándote  
ca vegada más, ye que tas cayendo  
nesti abisu d'irrealidá permanente

## YO FUI CATÓLICU

Las güestia, asusta con cirios,  
les sos manes rellumen na escuridá natural  
y non cola claridá nin de día.  
El gadañu roza tiestes  
y les ánimes zuquen  
el sangre derramao.  
Equí, les pantasmes españen  
y los cures recen.

## PRIMER CONTAUTU DE MUGA

Entama cayer la mugà cuandu de lloñe  
s'escucha'l pianu.  
Qué sele cae, y qué murnia s'avecina la tarde.  
Mueya los coches esti autóctonu agua  
qu'anxélicamente esboliga pente les nubes  
y ente nosotros amiya.  
Cuantayá, muga, nun visitabes la primavera,  
de magar el branu l'iviernu y agora equí aportes,  
seronda, sele, sedienta... mientras el pianu  
nun asela y los dos m'acongoxáis la tarde.

## ATRAICIÓN

Ente la espada y la parea  
taba la madrugada  
endolcada per una música denso.  
Descubrí percusiones  
a puntu d'españar y vi la mio oportunidá.  
Lentamente, apresuréme  
a recorrer les tos costures  
ente yemes, siempre  
d'abaxu hacia arriba.  
Y naquel intre mil llabios  
mordieron los mios  
con un únicu aliendu.  
Quiciabis sangre de placer;  
tenía dos manes que xubien  
comu la espuma,  
dos güeyos cuasi ciegos,  
un obeliscu arroxáu  
y millones de músculos tensos.  
En pocos segundos, exploré l'Universu  
de la to maldá.

## LLANES BREVE

El prau ye verde,  
los praos son verdes  
onde carbayos forníos  
xorrecen...

Allá, el mar tranquilu...

En Llanes les montañes son planes  
y un almendru en flor, color malva  
la engalana.

Roques fíes de la tierra  
aselen na rimada,  
son xixilantes pa guardar paz.

## PERRA VIDA

Les mexaes de los perros siempre tienen compañeru  
seya árbol, farola, requexu...  
Y hai personaes que valen menos que la mexada d'un perru  
pos nun tienen compañeru nin lu merecen.

## AMOR APUÑALÁU

A mí gustábame la poesía pero quitómela'l mélicu,  
por fin descubrí que la ciencia sirve pa daqué útil.  
Volvíme carne de llátigu, soi pelleyu curtiu que nun ye capaz  
de sudar llárimas por munches batalles que pierda.  
Nun hai llugar pa la compasión nesti riesgáu corazón.  
Solamente m'esmuél yu, collaciu de los míos pocos collacios  
y de delles alcordances realmente guapes.  
Nun hai pasáu, lo demás apodrenta, somos reis de la basura.  
Una pallabra y una navaya: la navaya pa cortar la pallabra,  
la pallabra nun sé pa qué.

## AZUL

Salí fuera un día, ilusu  
capaz d'escaecer el verde.  
Un incompletu arcu la vieya  
nun ye tal por incompletu,  
que'l verde que yo mamé  
llévolu vivu perdientru  
y la verdá qu'ensin el verde  
vi lo prieto y cuasi muerro.

## XUNETU

La mesma playa  
les mesmes nenes roxes  
el mesmu Sol  
los mesmos alboreceres  
la mesma compañía  
les mesmes barques  
el mesmu branu  
los mesmos camientos  
que tú y yo namái sabemos.

## BOCA ARDIENDO

Tres beber una caxa sidra  
al alborecer forniqué cola señora  
que recoyía restos de dientru  
les papeleres del paséu marítimu.  
Despedímonos cola mirada  
ensin cruciar pallabra.  
Alboreció otru pletóricu númberu  
y yo enfilé pal mio colchón mugorientu.

## FUTURU IMPERFEUTU

Escucho siempre lo más raro  
estos güeyos ven lo poco visto  
esta mente buxa alienda secretos  
qué típico ye lo normal  
valga la redundancia  
ellos nunca ven más qu'agora.  
Vida al estrañu, invisible, inciertu,  
anormal, cuadráu y futuru futuru.

## SEÍZO

Siempre con un melgueru amargor  
y un desengaño omnipresente  
porque l'home ye animal  
de costumes pese a quien pese,  
y aquél, por más que lo intentaba  
nun conseguía matar l'acidez  
que constantemente lu perseguía,  
igual que'l disparu antecede  
a la traxedia; enxamás-y  
gustaron los finales felices.

## SADO

Quiero que seya lo que Dios quiera  
o si más te peta  
quiero que m'estroces y me percutas  
comu a un panderu.  
Yes perllibre d'usar vergayos  
o llátigos de siete coles,  
mátame si nagües por ello.  
Si asina nun lo faes ye posible  
que yo tome les riendes  
y te dome cual yegua xabaz  
simplamente porque lo mereces.  
Pincha un discu violentu  
despréciame per esa boca llagarta  
o cúspeme sangre a la boca.

## AUTORRETRATU CON "BLUES"

Barba de tres díes  
y la güeyada fixada en  
sabe Dios qué puntu  
porque aquel home  
camentaba nesi intre  
más que nunca lo ficiere  
que'l so destín arrecendía  
a un perescuru color.  
Del álbum de semeyes escoyó una de la so adolescencia  
y contemplóla clisáu  
durante un bon ratu;  
inoró teléfonos y timbres.  
Pescanció entós que'l  
tiempu diba tres d'él.  
Too foi necesario  
pa qu'aquel home mirara'l reló  
convencíu de que yera un perdedor.

## DUBIA

Una botella nes últimes  
manchó les sábanes.  
Tola to ropa esperdigada  
pela habitación  
illuminada pola tardiega lluz  
d'aquel Xunetu.  
Escúchote cantar baxo la ducha,  
tú, tan segura de tí mesma  
y tan gayaspera,  
tan distinta de mí.  
Dubio seriamente si recibite  
tan de contino.